

Candela feroz a destrui edificio di Carex Papers

Tabata mas o menos 2 or di diasabra madruga, cu Polis y Cuerpo di Bombero a haya informacion cu tin un candela grandi na Eagle. Ora cu e prome unidad di bombero a yega, nan por a constata cu aki tin un trabou grandi pa haci, y cu tin masha ora di trabou. Dicho hecho, pasobra tabata te den oranan di mainta, cu por bisa cu e candela a ser domina.

Kico ta su origen, no ta conoci. Carex Papers, tabata un di e fabricanan di papel na Aruba for di basta tempo caba. Ta trata aki di un edificio bieu, cu no ta cumpli cu reglanan di seguridad contra candela y di acuerdo cu nos informacion e edificio aki tabata of a ser bendi caba cu un conocido comerciante local, kende tin plannan grandi pa construi

un compleho nobo n'e sitio ei.

Papiando cu e oficial na turno di Cuerpo di Bombero, Eduard de Cuba, ta bisa cu e prome informacion cu nan a haya na Kazerne di Bombero na Tanki Flip tabata cu e edificio di Playa Liqour ta na candela. Pero ora cu a yega n'e sitio, a resulta cu tabadta e edificio di Carex Paper, cu n'e momento ei ya candela a domina henter e edificio.

E trabou di bomberonan mas bien tabata pa contene e candela n'e edificio ei so, evitando expansion, p.e. e edificacionan pabou di Carex, cu tabata core peliger tambe, ya cu nan ta hopi pega na otro.



Según Eduard de Cuba, e trabou no tabata facil, si mira cu tabatin materialnan peligroso, e.o. varios boter di gas, cu lo por a haci e situacion hopi mas peligroso. Loke nan por a scapa di Carex, ta loke tabatin den e oficina.

Cuerpo di Bombero a saca tur unidad, pasobra manera menciona, e prome informacion cu a drenta ta papia di edificio di Playa Liqour ta na candela, ya cu e ora ei ta papia di alcohol cu ta mas flamable. Mester a haci uso di e.o. e hoogwerker pa yuda combati e candela.

Carex ta traha completamente di aluminium, cu ta motibo tambe cu el a cai den otro, dor di cayente. Paden tabatin un deposito di papel, loke a haci e trabou mas dificil pa por paga e candela mas prome. Kico t'e causa of unda el a cuminsa, Eduard de Cuba, no por bisa nada di esaki. Esaki t'e prome candela mas grandi te awor, según e oficial na warda. E candela aki sigur a hala atencion di hopi hende, maske tabata den oranan di madruga. Diasabra mainta, ainda tabatin candela, maske ya e ora ei e tabata domina.